

NO SOALAN: 30

**PEMBERITAHUAN PERTANYAAN DEWAN RAKYAT**

**DARIPADA : YB TUAN TAN KOK WAI  
(CHERAS)**

**PERTANYAAN : LISAN**

**TARIKH : 15.11.2017**

**YB TUAN TAN KOK WAI (CHERAS)** minta **PERDANA MENTERI** menyatakan bagaimana strategi memerangi rasuah dalam negara ini direformasikan memandangkan wujudnya kesangsian yang serius ke atas pelaksanaan dasar, kelemahan semangat politik dan kekurangan sumber.

**JAWAPAN:**

Tuan Yang di-Pertua,

Untuk makluman, sejak tahun 2009, usaha serius Kerajaan telah jelas diperlihat dalam memerangi rasuah dengan adanya transformasi Badan Pencegah Rasuah (BPR) kepada Suruhanjaya Pencegahan Rasuah Malaysia (SPRM) melalui penggubalan Akta Suruhanjaya Pencegahan Rasuah Malaysia 2009 (Akta 694) dengan persetujuan Parlimen. Transformasi ini adalah bertujuan untuk meningkatkan keberkesanan dan kecekapan dalam usaha pencegahan rasuah serta memperbaiki persepsi kebebasan serta ketelusan dalam pelaksanaan fungsi-fungsi suruhanjaya. Bagi menyokong usaha keseriusan Kerajaan dalam pembantaranan rasuah, Program Transformasi Kerajaan (GTP) telah

diperkenalkan pada tahun 2009 yang merangkumi 7 Bidang Keberhasilan Utama Negara (NKRA) yang perlu diberi fokus dimana salah satunya adalah NKRA Membanteras Rasuah. GTP merupakan sebuah pelan transformasi yang dinamik dan NKRA Membanteras Rasuah ini bertujuan menangani isu rasuah melalui inisiatif yang meluas untuk menangani masalah rasuah daripada atas ke bawah.

Antara inisiatif yang telah dikategorikan sebagai *big fast result* sepanjang GTP 1.0 (2010 – 2013) adalah penubuhan Akta Perlindungan Pemberi Maklumat 2010, mempercepatkan perbicaraan kes rasuah dalam tempoh satu tahun, mewujudkan portal MyProcurement yang bertujuan untuk menunjukkan ketelusan Kerajaan dalam perolehan, pengwujudan *Integrity Pact* dalam perolehan kerajaan, mengurangkan karenah birokrasi dalam agensi penguatkuasa dan penubuhan Mahkamah Sesyen Khas Rasuah yang hanya mengendalikan kes-kes jenayah rasuah. Semua inisiatif daripada GTP 1.0 telah dipertingkat serta dipantau dengan lebih mendalam menerusi GTP 2.0 (2013 – 2015). Usaha diteruskan dengan lebih meluas di bawah NKRA Membanteras Rasuah di bawah aspirasi Rasuah Besar, yang mana kini SPRM sedang dalam proses memuktamadkan peruntukan Liabiliti Korporat untuk dimasukkan dalam Akta SPRM. Liabiliti Korporat merupakan satu peruntukan yang mewajibkan syarikat korporat bertanggungjawab penuh ke atas kakitangannya yang didakwa terlibat dengan jenayah rasuah. Selain itu, satu lagi inisiatif yang amat memberikan impak yang tinggi terhadap usaha Kerajaan dalam memerangi rasuah adalah dengan wujudnya satu mekanisme Pembiayaan Politik yang telus dan berintegriti.

Mekanisme ini telah dipertanggungjawabkan kepada Institut Integriti Malaysia yang mana ianya bertujuan untuk mengenal pasti sumber atau dana yang disalurkan kepada parti politik dalam menjalankan kempen pilihan raya serta mengisyiharkan dana tersebut. Inisiatif-inisiatif ini dianggap satu hasrat besar Kerajaan dalam memerangi rasuah dan akan memberikan impak kejayaan yang amat tinggi kepada negara sekiranya ianya berjaya dilaksanakan dan menaikkan persepsi positif pelabur luar negara terhadap negara Malaysia.

Selain daripada transformasi Kerajaan dalam menangani gejala rasuah, Kerajaan juga telah meluaskan usahanya melalui pelbagai inisiatif lain sebagai kesinambungan daripada GTP ini yang bertujuan untuk menutup ruang dan peluang berlakunya jenayah rasuah terutamanya dalam sektor awam. Antaranya dengan menubuhkan Unit Integriti di semua kementerian/jabatan/agensi di sektor kerajaan dan juga beberapa dalam sektor korporat. **Unit Integriti** adalah mekanisme kawalan dalaman agensi yang mana penubuhannya di **887 agensi awam** sejak 4 tahun lalu dilaksanakan secara berperingkat dan berperanan sebagai *focal point* kepada pengurusan isu-isu berkaitan integriti di semua sektor dan merupakan usaha kawalan dalaman agensi untuk menguruskan integriti dalam organisasi. Unit Integriti ini berfungsi berlandaskan 6 fungsi teras iaitu tadbir urus baik, pengukuhan integriti, pengesanan dan pengesahan aduan salah laku jenayah, pengurusan aduan, pematuhan terhadap undang-undang serta tatatertib. Pada masa ini, Unit Integriti ini adalah di bawah seliaan Bahagian Pengurusan Integriti Agensi (BPIA),

SPRM dan pada ketika ini, CeIO yang terlatih dan yang telah ditauliahkan adalah **seramai 491 orang** dari pelbagai skim perjawatan. Pegawai-pegawai berkenaan bersedia membantu pengurusan Unit Integriti dalam memantapkan pengurusan integriti dan tadbir urus kementerian/jabatan/agensi masing-masing.

Usaha serius Kerajaan dalam pemberantasan rasuah, meningkatkan integriti dan tadbir urus baik dalam perkhidmatan awam diteruskan lagi dengan mencapai kesepakatan dalam menubuhkan Jabatan Integriti dan Tadbir Urus Negara (JITN) yang dinaiktaraf daripada Bahagian Integriti dan Tadbir Urus (BITU) di bawah Jabatan Perdana Menteri. Jabatan baru ini akan berfungsi sebagai peneraju inisiatif pemerkasaan integriti dan tadbir urus negara secara lebih holistik melalui pengukuhan integriti dan tadbir urus serta bidang hak asasi manusia dalam sektor awam serta swasta. Peranan ini dilihat sebagai satu mekanisme yang terbaik untuk menjadikan JITN ini sebagai *focal point* terhadap pengurusan isu-isu pencegahan rasuah, integriti dan tadbir urus negara di samping membantu agensi-agensi yang terlibat secara langsung dalam pemberantasan rasuah.

Sekian, terima kasih.